

Bilang 3
Libreng Copia

Junio 26, 2022



Mekening
mamasa
abe

Mayap
a
komusta



Mangapampangan

2022 © Anac Ning Arenas

Jamu

Sinulat: Anac ning Arenas

Imprenta: Kapampangan Publishing Services

Email: capampangan@whereishome.info

* Dominguan a babasan, luluwal balang aldo Domingo

2022 © Anac Ning Arenas
Kapampangan Publishing Services
Email: capampangan@whereishome.info

Copia Bilang 3 – Junio 26, 2022.

Kalamnan:

<i>Apipisabi Mu</i>	3
<i>Crusada:</i> Mangapampangan Tamu	4
<i>Corido:</i> Adarna, Ing Encantadang Ayup	8
<i>Jstoria:</i> Kapampangan - Ernesto C. Turla	15
<i>Nobela:</i> Aracnidu –Prinsiping Babagua	18
<i>Palaisipan:</i> Kurusan-Amanu #3	22
<i>Kuwentu:</i> Kapalaran.....	24
<i>Kanta:</i> Atin Ku Pung Singasing	27
<i>Poesia:</i> Indung Capampangan	28
<i>Kumidya:</i> Bulbul Asu, Bulbul Kabayu.....	31
Salamat pu keng pamamasa.	32

Apipisabi Mu

Ngara reng sasabi ketang decada 2010, tatayan dang mate ya ing kekatamung Amanung Sisuan kilub ning dinalan (100) a banua. Buri nang sabian, kilub ning siyam-a-pulu, manibat ngeni. Dapot bakit ya pin mate ing salita tamu? Darandaman ta ne man at ababasa kareng chat rooms aldoldo kareng kabalen tamu. Suspetsa ya mu kaya o pamaging madalum dum panando ing kapanwalan a mesabi?

Bilangan ta la reng sintomas, at karelang epektu keng kabilian ning Amanu:

1. Laganap na ing pamagsalitan e Kapampangan keng mismung Pampanga, lalu na kareng kayanakan.
2. Kareng iskuwela, nung nukarin karagulan manibatan at magagambal ing kaisipan ampon kabiasnan, e Kapampangan ing gagamitan salita kareng lisyun ampon komunikasyon.
3. Keng bale, pauli da marail deng aduang sangkan mesambitla babo, keraklan, e namurin Kapampangan ing gagamitan pakipagsalita kareng anak.
4. Kareng pusingan, kapulungan, ampong katatagan, mas madalas ing e na Kapampangan ing gagamitan dang salita reng talapagsalita.
5. Kareng dalan, tindakan, palengki, at aliwa pang pam-publikung lugal, alus e la ngan keng Kapampangan deng paskil a karatula, kautusan, ampong kapabaluhan.

Keng malaguang sabi, nung deng anggang mibait a anak manibat ngeni e na Kapampangan ing akagisingan dang panyabi, siyam-a-pulung banua pa, alus mengamate no ngan deng magsalita pang Kapampangan, at deng bait-ngening e magsalitan Kapampangan ila nang mabie.

Keng ikapanatili ning Amanung Capampangan 3



Letratu at disenyu keng kapagalan nang Ka Joel P Mallari at ning keyang grupung Kapangulis at aliwang boluntaryu.

Crusada: Mangapampangan Tamu

Mayu 6, 2011 – Mikatawan ya ing proyektu, kapamilatan nang Myra Paz Lopez (sinulat ne keng Ingles), a milikas keng kepampangan anti keng lalam.

PONDUNG KAILANGAN

Gastus Paimprenta

Stickers (P20/pirasu x 2000)	= P 40,000
Karatula (P50/pirasu x 2000)	= 100,000
Tarpulina (P160/pirasu x 1000)	= 160,000
Papilitus (P1.50/pirasu 50,000)	= 75,000
	=====
	P375,000

Keng ikapanatili ning Amanung Capampangan 4

<u>Implementation</u>	P125,000
	=====
<u>Sumang Gastus</u>	P500,000

Ing "Implementation" kayabe na ing gastus pamasahe/gasolina ampon para pamangan at minindal da reng boluntaryung mangikalat kareng materiales, kareng balen-balen Kapampangan.

Mayu 6, 2011 Bank Account

Pisabi rang Anac Arenas at Atching MyraPaz Lopez ing tungkul keng pamamuklat Bank Account para kareng pondung kailangan ban gastusan keng proyektu a manibatan keng minunang mebanggit a pamanyawad donasyon.

Anak: Padala kung pamuklat account, open ta ne? Ba ta nang maka-pangolecta?

Anak: ali na BDO

Anak: maski BPI, basta itang atin internet access keng account statement.

Anak: P5,000?

Anak: sabi ku kang Ka Robby agyu ku P20K mu, ne?

Anak: Ot e la makalista reng 22 balen? Palengki, Malls, Plaza, Entrance- street - keni la kailangan deng banners ampong posters

Anak: Basta a-cover ta la ngan deng 22 towns/cities, malls, markets, municipal/city halls, main streets, stores, front of schools, parishes

Anak: O ing permit pala?

Anak: Town permits

Anak: Kailangan abalu ta pa nung allowed ita. Pota rugu sayang lamu reng pagawa tamung posters

Mayu 9, 2011

Ca Robby, Cong Nestor, Cong Ray, Ca Romy, Ca Ed, Tang Ernie, Tang Felix, Ca Doy, Ka Rene,

Mayap a oras pu.

Aganaka ye pa pu siguru ing pinaskil nang munikala ning kapatad a Estong Sigua ketang mapilan nang mengalabasan a bulan, "Mangapampangan Tamu". Mekapilibe kami pung mapilan private emails.

Pauli na pu nita, lepitan ke y Ca Robby nung magsilbi yang i-commision ing CKS para gawang metung a crash Project Study nung magkanu mo ing kailanganan para mangikalat "Mangapampangan

Tamu" stickers, posters, banners, tarps, at flyers.
Oini pu ing resulta. Pakilawe ye pu nung ngayu
paya.

***Maragul a pasalamat kareng makatuking
mebanggit keng babo kasulatan.***

Myra Paz Lopez – CKS/HAU

Joel P Mallari – CKS/HAU

Grupung Kapangulis at Boluntaryu

*Ca Robby, Cong Nestor, Cong Ray, Ca Romy, Ca Ed,
Tang Ernie, Tang Felix, Ca Doy, Ka Rene*

--- Atin ya pung katuglung keng tutuki ---



Corido: Adarna, Ing Encantadang Ayup

...

Minilig ne at sinandal
quetang pun ning dutung a mal
at qng sobra nang capagal
mipatucba yang marapal.

Keng ikapanatili ning Amanung Capampangan 8

Nanu't inyang taimic na
ing bengi linalam ne ya
yanapin ing panyatang na
ning ayup a engcantada.

Dinugpa yang alang liwag
queng dutung a Batung Pilac
caibat ne ing bulbul pigpag
memalit yang cule agad.

At pangaibat ya migcanta
iting ayup engcantada
ing basis na sabian mu pa
tutung caliga-caligaya.

Ing principe ali ne na
amalen pa ing panganta
caministilang sabian pa
tutud nang alang capara.

Ugali na ning Adarna
nung mayari yang magcanta
ya namang pamanacla na
at matutud na canita.

Queng maroc nang capalaran
principe mitaclan ya yan
meguing batu yang tengalan
ing macamal nang catawan

O nanu ing agawa pa
neng ngeni meguing batu ya
sabian pa ing pamanaya
ning mal a Ari nang tata

At inyang meguing pabanua
e ya pa daratang wala
inutus ne panguqueta
y Don Diegong pangadua na



Memintu't e sinalangsang
qng Ari a queyang tatang
sidya na ne at gueyacan
ing cabayu nang saquenán

Pangasadia linacad ne
cabunducan pepa-ume
at panintunan neng tune
ing ayup Adarnang paque

Maiguit ya queng limang bulan
miglacad qng caparangan
e na neman asumpungan
ing Tabor a cabunducan

Iniang dinatang ne caibat
qng dalan a pasalungat
melaus ya at minucyat
iting principeng malacas

Queng malas a capalaran
pangaras na qng quetasan
mitomba ya't mate ne man
cabayu nang sasaquenán

Nanu pa ping agawa na
qng cabayung mebungu na
quingua na ing abastu na
at belaus ing lacad na

Iniang carin miras ne man
qng Tabor a cabunducan
atin yang dutung a disan
riquit e macanyan-canyan

Nyang queya yang apagmasdan
Batung Pilac yang tanaman
ding bulung na la quiquinang
alang capara ya leguan.

Ing linub qng panalala
ning pricipeng maquitsura
ing dutung a macayama
apunan ne ning Adarna

Queng pun na ning dutung naman
atin yang batung amatan
cristal ya ing cayantian
macawili yang pagmasdan

Carin ne pamu ayalac
ing dutung a Batung Pilac
lante guintu ya ing balat
wari yang batung de oyas

Qng tula na at ligaya
queng tanaman nang amata
oras mag-alas singco na
ding ayup dinalan na la

Queng caracal ding dinalan
ding ayup a macasawan
alang tinuclu metung man
qng dutung nang apagmasdan

Caring dutung nang cayabe
docal ayup a babasle
bucud tangi nang ali re
ding ayup dugpan dang pane

Nanu't iniang linalam ne
ing cabengian taimic ne
queng batang iquit na lele
migpampan yang pacalale

Nanung quemale-male na
a qng queyang pamanaya
ya napin ing panyatang na
ning mal a ayup Adarna

Dinugpa yang agad sucat
queng dutung a Batung Pilac
at semasan na ne caibat
ing bulbul nang atmung gilás

Queng principeng mecamasdan
qng ayup a cariqitan
nuca ca ngeni capupuntan
nune ding gamat cung talan

At iniang casamasan na
ning ayup a engcantada
ya napin queyang panganta
tutung caliga-ligaya...

--- **Atin ya pung katuglung keng tutuki** ---

Storia: Kapampangan - Ernesto C. Turla

Poeta Laureado Ernesto C. Turla

Pagkapuring Kapampangan, "Tang Ernie", Ernest C. Turla
Pamuntuc na ning ANASI, aguman da ding macudta
Qng Olimpu ning Parnaso Laureado cang dakila
Gagalang da't caluguran ding makakilalang sabla
Kabalitan qng genacan karing bisita't mamapa
Ing bale yu santungan de't kambilan ding mipasalta.

Ing lugud yung parang tau, sasaksian ding ka-aguman
Ding dakal yung asosasyon gugusala't pakyabayan
Sibul na ning tula't saya, kapasnon ning kasakitan
Ding kecong medical missions caring taung mangailangan
Promotor na ning panyulung, ning mal a Amanung Sisuan
Asyas a dalise guntu ning Balen ding Kapampangan.

Nung mipadpad cayung labuad iti e meging balakid
King lugud yu king Amanung pakamalan yung masagid
Mekad miguit pa'ing suyu yu, lugud a alang katulid
Caring e man memandayuan malaut naman balikid
Nanu man ing panyukad na, cabalen o magumasid
Keng lugud yu at serbisyu, ninu pang mas miguit at Luid.

Mapalad la ding mitagkil, akilala yu Tang Ernie
Pauli yu ing lugud da king Amanu meging sugi
Ding alang sawa yung canta, paganaca, panasisti
Mangalugud yung amanu, pa-kumpiansa king sarili
Deti ilang kasangkapan bang imbutan ing magsilbi
Sumuyu king Indung Sisuan, Amanung peka-mal dili.

Y ERNIE C. TURLA, mestru yang English, talasaliksik bokubalaryu, poeta laureadu, talasulat, talasalugsug ning pilosopia, makabalen.

Mibait ya ketang January 6, 1938 king Lubao, Pampanga, Philippines.

Menuknanganan yang perminenti Amerika inyang 1968, at megyaring B.S. in Education, A.B. in English, and Ph.D in lexicography.

Sinulat na la reng "Author of Classic Kapampangan Dictionary", "Kapampangan Folk Songs and Poetry", "The Divine Fairy Tale", "Angelina The Avenging Angel".

President ya at pundador de reng: Akademyang Kapampangan International, Academia Ning Amanung Sisuan International (ANASI), Aguman Capampangan Northwest U.S.A.

Deng poesia na misulat la kareng librung "A Prism of Thoughts", "Rhymes of Greatness", "Best Poets of the Millennium", at aliwa pang librung pepalimbag ning National Library of Poetry.

Pundador ya naman at talapamilatan da reng diskusyunang grupung DILA (Defenders of Indigenous Languages of the Archipelago), Searchlight, Fil-am Forum ampon Amanung Sisuan.

Pitunganan neng korona bilang "Poeta Laureado"
ning the Holy Angel University inyang May 17, 2008,
at ning United Poets Laureate International ketang
August 10, 2008.

--- ooOoo ---

Nobela: Aracnidu –Prinsiping Babagua

...

Anac Arenas,

Ayy rugu naman suspense ya pa ing Cabaryung Babagua! capilan ya pu ing next episode na?

Cagaling yu pu talaga... Macalibang lapu, Mang Cati, Mang Anto, Cabaryung Babagua...simpli lamu pu datang pero macabaldugan la...at pinacamasanting niti...macatula la! Oren deng clasing panenayan da laluna ring cayanacan... cung sa bage, cabilang ta pa pu caren . Ngeni pu casing panaun a iti, aliwa no panlasa ding cayanacan... mapilan na lamu ding miqui-ilig quing poesia. Puru rap/cangye musica ing ilig dana...pati ngapu ding anac cu madadala caring mangye musica...pauli ning pamaquiabe. Pero mumulat cu pa rin carela ing santing quing pamanyulat, pamamasa at pamangagcas poesia. E marayu pu quing saup ning lbpa, atin caring anac cu pu (ing bayung generasyon no pu canita)...a tuqui bacas caring pipunpunan ming Mercado.

Capatad,
Marites

Calundag na ning Babagua
digpa ya qng lipat bacud
quetang malinatnat gabung
queng capapalis mecudcud
at ing anac a mamagua
e macapanuala ing lub
ing panggalameng tropeo
mewala yang cabud-a-bud

Ining paslit dururut ya
aplit queng gabun manintun
sisilad na la ding mata
caring babo't-lalam bulung
"o pota mibalsac ne man",
ngana, "quetang siping ning pun"
basta't aquit-ne't-aquit-ne
dasan ne man ning dalumdum.

Samantala, quetang lipat
bacud naman ing Babagua
e pa lubusang miligtas
quetang disgraciang minamba
uling queng cayang bigsacan
panas no mang meglipana
samal mu namang manintun
pangcabyayan queng masala.

Cabud iquit nong Babagua
detang suldadong salusad
agad linub qng isip na

itang disgung macabungad
panaquit da qng bagsac na
lisuban deng agad-agad
paporma reng selicupan
mingatbang gilid na't arap.



Dapal-dapal yang minurung
i Babaguang mesalicup
mengalpac ing pamisip

maibug mangaina pilublub
dapot e na apabustan
ing masucul ya't matucup
uling pilming camatayan
ing pangacu ding lulusub.

--- **Atin ya pung katuglung keng tutuki** ---

Dalasisipan: Kurusan-Amanu #3

1	2	3	4	5	6		7	8	9	10	11	12
13						14		15				
16									17			
18								19				
20			21				22					
23		24				25			26	27		
	29				30				31			
32				33		34		35				36
		36	37				38				39	
40	41					42				43		
44					45							
46				47		48						
49							50					

PABAKLE

1 Siping ning Magalang

7 Maglinis malan

13 Libutad

15 Ubas

16 Yaku na (3,5)

17 Tune

18 Tikman

19 Bayu

20 Isaac Santos (1,1)

21 Makalamang

23 Matipid a aili

25 Anak a lalaki

PABABA

1 Siping ning San Simon

2 Kundisyun

3 Galo ning dagat

4 Antimurin

5 Utusan

6 Saktu

8 --ULU (Bilang)

9 Tumulu

10 ----- LUB (Ipaginakit)

11 Bitis

12 Ipiblas

14 Nanung gawan

26 Lako keng kalang	19 Anak a lalaki
29 Ilutu (unyab)	22 Matan
31 Mayap (kinuyad)	24 Manganganta
32 Palagyu	27 Ipakarga keng gulut
33 Migit	30 Tibubus
35 Magaspang a gabun	31 Sumayu
36 Piblasan	32 Aguman nang Poeta Gallardo
39 Pet Escudero (1,1)	33 Maulaga
40 Sukad	34 Sugud
42 Balen Bacolor	35 Asan
44 Yanasa	36 Papel a atbusan
45 Mabilis	37 Tabla
46 Gamit salibatbat	38 Atagmuan (beliktad)
48 Negosyu	41 Manget a insektu
49 Parsalanan	43 Palayo ning Lucas
50 Labing-adua	47 Sana (kinuyad)

PAKIBAT:



<https://capampangan.whereishome.info/quiz/3>

Kuwentu: Kapalaran

Pangane ya y Perla kareng kapatad na. Apulu lang mikakapatad. Alus banuaan yang menganak y Ima na. Ortelanu ing obra nang Tatang nang Perla, a paki-samakan nang pale ampon atbu.

Mibait ya y Perla keng panaun a deng pangane anak a babai papagaral la mung anggung Grade 6, munang-muna, nung medyu e masyadung marangya ing kabilian. Lalu na pa't potang makiasawa la, keraklan mu ing ken la mung bale at e man makapanintunan. Nung inya y Perla, Grade 6 mu ing ayabut na, at tinuknang ne. Sinaup ne mu kareng pengari na keng pamaningat kareng makawali nang kapatad.

Kekeng keraklan dang mikakapatad, pati reng kapatad nang lalaing Perla e la munaman mekapagaral matas a antas, at alus Grade 6 murin ing ayabut bayu la sinaup menasik keng marangle kang Tatang da.

Makanyanman, y Perla atin yang ambisyun mitas la kabilian keng pamibie-bie, sumangid ning karelang balamu "milalabas" mu keng kasalukuyan. Inyang disi-otsu anyos ne, mekisabi ya kareng pengari nang paintulutan deng manintunan sarili na, agyang ken mung pamakyabe. Ngana, iti para kareng kapatad na, nung e man para kaya. Aintindian da naman di

Ima na't Tatang ing kayang mayap a kapagnasan,
nung inya laban man keng lub da, penusigan de.

E man megluwat, mekapagobra ya y Perla keng
metung dang kabaryung medyu mibagwa keng bie
kapamilatan ning pamagtinda keng balen.

Pamaningat-anak ing binie rang obra kaya, libre
egana-gana, pati na bakasyon aldo Domingo balang
kinsenas, nung nukarin ya makauli keng karela. E
man ketasan ing suweldu na kumpara kareng mag-
upisina, dapot pablasang libre ne pamangan at
tuknangan, pati na imalan a panyali ra kaya,
makatipun yang bagya-bagya. Makapanuli ya pang
pasalubung kareng kapatad na indat mumuli ya.

Apat ya rin banuang mekipagobra bilang kayabe y
Perla bayu ya mekatipun ditak a pag-umpisa.

Minta ya Menila y Perla bakal deng atipun nang
pera. Mekapakisabi yang makituknang keng metung
nang bapa kang Tatang na. Mekisulut ya keng
kuwartu ning pisan nang dalaga munaman.

Karas Menila, e minyayang panaun y Perla at
mentintun yang akapanintunan

Miras ya Divisoria nung nukarin ya mekapakipag-
tindang bentang imalan. E binang limbat, pangasane
na keng kalakaran ning pamagtinda, ginamit no
reng tipun nang pera ban magsariling tumpukan a
puwestu keng bangketa.

Kaibat ning pabanua, mekapanupa neng sarili nang metung a kuwartu malapit keng Divisoria. Tutuking banua, ikua ne ing metung nang kapatad a babaing pa-haiskul na, at pepagaral ne Menila. Neng kaibat keng klasi, ampong Sabado Domingo, kayabe neng magtinda. Kaibat aduang banua, ing metung namang babai murin kapatad ing tinuking magaral haiskul, at kayabe rang magtinda neng ala keng iskuwela.

Saguli pang panaun, manupa neng metung a apartment y Perla kayabe reng kapatad na. Meyari neng colegio ing metung kareng wali na, at tuki-tuki nong mekapagaral deng aliwa pang makawali.

Samantala, e na na ayarapan Perla ing pamakiasawa, keng ka-okupadu na keng negosyu at pamag-pagaral kareng katapad na. Dapot masaya ne man at alang pamagsisi, pablasang ayangat no keng bie reng kapatad nang mekapagaral. Iya man, mekasali neng sarili nang bale ampong saken, nung nukarin la munaman tinuknang deng kapatad nang tunggal-tunggal mekapagyaring kursu, at mekapantun masanting a obra.

Lubus ing kapag-maragul da reng pengari na kang Perla, at lalu na reng keyang kapatad a apa-pagaral.

--- ooOoo ---

Kanta: Atin Ku Pung Singsing

Atin ku pung singsing
Metung yang timpukan
Amana ke iti
Kang Indung ibatan

Sangkan keng sininup
King metung a kaban
Mewala ya iti
E ku kamalayan

Ing sukal ning lub ku
Susukdul king banua
Mikurus kung gamat
Babo ning lamesa

Ninu mang manakit
King singsing kung mana
Kalulung pusu ku
Manginu ya keya.

--- ooOoo ---

Poesia: Indung Capampangan

© Anac Ning Arenas

Indu, oini ne ya, miwale mung bungsu
mumuli na queca, caibat miparayu
abe nong magbalic, beluan, diua't pusu
quecang pepabakal quilub na yang salu

Taruk mu Indu cu, nung nanu ing sangcan
ing pamaglaut cu nung baquit keilangan
bang ining beluan cu, potang queng tatacan
atin yang ulaga nung quecang cailangan.

Wa, tutu pin Indu, qng cacung paglaco
ela ditac a luwa tinulu queng pago
bista't man sabi mu, mayu ca, bunsu co
balu cung pusu mu qng eya mipasno.

Ngamu pa, i Ima, pati na i Tatang
ica mu ing dilang qng bie da keilangan
dapat qng lugud mu, emu cu pigilan
at ing bendisyun mu canacu yang dalan.

E mayan o Indu itang pamaglaut
miwale ing pusu caring cacalugud
lalu pa't ela man quesiyasan pa ding tud
meco cung qng salu, ding carug at tacut.

Dapat ing anac mu, inaus cung Tatang
ngana qng bili cu, bina yang cailangan

ing magsacripisyu't magdulap cabiasnan
ban potang muli cu dobli paquinabang.

Anya oita, Indu, queca mirayu cu
sumangid ning cascup at salbat ning lub cu
ban qng potang aldo, caras ning oras cu
yampang cung cabiasnan queca o Indu cu.

Calupa ning ayup linaut qng ardin
silagpo qng banua, pisyalan ding batuin
dapot bayu bengi, catacap ning silim
quetang cayang sale, migbalic pa mu rin.

Mequipag-palad ya ing lugud mung bunsu
memaltang yang dagat, mi-yaliwang pulu
pequipagtaguisan ing beluan na't agyu
ba neng dinan puri ing licuan nang Indu.

at caniti Indu, menandam cung Dila
guinamit amanu caretang banyaga
dapuat qng pusu cu, Indu, at qng diua
edaca quelinguan, bagya ma't bitasa.

Bista man ecu la gagamit ding agcas
at detang mapilan, mepurul qng tayas
queng salu cu Indu, ali la kinupas
agyu lang bagutan qng nanumang oras.

Mewala ya'i Tatang, sinubli qng banua
quetang cayang siping bunsu na ala ya

meco ya ri'y Ima, ala yung bunsu na
e ne rin acaul, katda pangisnawa.

Dapot iatna me ing canuan mu Indu
ba cu lang pulisan ding lua mung tutulu
quening panuli cu ing cacung pangacu
ene miwale pa ing mamu mung bungsu.

A e kapilan man ca migaganaca
a mipanganib ya ing lagyu mu mapda
uling ding susuyung anac mung macudta
eda ca paburyan qng quecang upaya

O nung sacali man, ing buri mu Indu
caring capatad cu, ing carug mung salu
pabustan mu Indu, queca cu isuyu
paganacan cu la, alang picacunu

--- ooOoo ---

Kumidya: Bulbul Asu, Bulbul Kabayu

© Anac Ning Arenas

Keng sular nang Beltu mipag-indredus la ding mikukumaring Mila, Jane, Culasa tungkul kang Marilou'ng mebuktut dalaga. Pilan namung aldo manganak ne pala, at ita ing sitsit na ning baryung madrona kaibat neng sinyasat ing migpakonsulta.

Ngana ning Culasa: "binabing Marilou, balitaktakan ya kasiri ing mabisyu. Pilan lang bulugan ding keya migkubu. E ya pepatugut anggang e linobu. Lagu-lagu ya pamo ing mainhing rebultu. Nung e nya sa lupang garetang gastadu".

Atupan nong Beltu ding dilang tsismosa kabang mipag-siyeti, galapakan la pa.

"Bibing Taratitat, magsi-uli", ngana.

"Babi yang mabuktut gagawa yeng isyu. Buski nanu namu pitaid-tairan yu, pati bulbul asu at bulbul kabayu".

--- ooOoo ---

Salamat pu keng pamamasa.
Antabayanan taya ing katuking bilang keng tutuking
Domingo.